



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir yimyim

TAPAK 7

2047 kum tashi nung India ya terenlok
linuk ka akumtsu: Rajnath Singh

Pakistan court kati ex-PM Khan
kinungtsu nem bail agutsu



VOL. XX NO. 213 (ADOK 213) DIMAPUR SANGTENNÜ (TUESDAY)

MONUPII (MAY) 16, 2023

₹ 5.00

NFHRCC atema lemtet aika agi

Dimapur, May 15, 2023 (TYO): May 13, 2023 nu Dimapur nung NFHRCC den PWD(R&B) ketdangsürtem, Foothills Contractor Firms, Dimapur nung amenoka aliba kin hohotem külem senden ka menogo.

Iba senden nung adenertemi Nagaland sorkar dang tan financial year nung iba mapatong ya NEC Funding atema Priority List nung dendaktsütsü atema mepishia metetdaksü.

September 22, 2022 nu NLA-i Foothills Road atema bangzüngtem agiba aser March 2023 nung 14 buba NLA alidang bangjemshiba ama inyaktsü

mepishir ta senden nung adenertemi ashi.

Senden nung adenertemisa Divisional EE, PWD(R&B), Divisional Contractors, kin hohotem aser NFHRCC züngsemtem dena Niuland nungi Tizit tashi tekaratiba nung joint inspection tour ka asütsü bangjemtepogo.

Kin hohotemi mulunga agizükba ama senden nung adenertemi NFHRCC kumzuka ayutsü aser kija mesüra telok kari danga committee anema tim masüba inyakra tapet mapa inyaktsü ta senden nung adenertemisa telemtetba agiogo.

CWT-i mapa tamajung inyakertem aitsür

Dimapur, May 15, 2023 (TYO): Chumoukedima Village Council ajanga May 11, 2023 nu Seiuruzha colony, Chumoukedima town nung alir nisung anati ozüng alema mapa inyakba osang sangdongba angashia Chumoukedima Watsü Telen-i (CWT) aoksar aser mapa tamajung inyakertem khukhua

Ozüng amertemi mapa tamajung inyakertem- Merentoba Imsong (Nukshiyim) aser Sentimongla Imsong (Yaongyimsen) na nem tapet temerenshi agütsütsü atema akhangba nung onoki nungita zülur ta CWT-i sangdong ka nung metetdaksü.

Sorkari NMA 2001 agienba ya kanga tajung

Kohima, May 15, 2023 (TYO): State sorkari Nagaland Municipal Act (NMA) 2001 agienba ya telemtetba tajungtem rongnung ka lir ta CAWD and Taxes Advisor Kudecho Khamo-i ashi. 18th Chozeba Assembly Constituency nungi Nationalist Democratic Progressive Party (NDPP) züngsemtem den senden amendang Advisor Khamo-i iba osang metetdaksü.

NMA 2001 ya Constitution nung Arrla 371 (A) alema lir aser iba atema civil societies-i anema noktak. Iba jagi Nagaland Legislative Assembly (NLA)-i agien ta pai ashi.

"Tawa sorkari agia aruba lemtet balala rongnung iba ya kanga tongtipang ka lir. State sorkari Arrla 371(A) tajungba nung meyipzüksü atema mapa inyakdar" ta Khamo-isa ashi.

Chief Minister Neiphiu Rio ya tashishitsü maliba lennir lir aser pa lenisüba kübok NDPP party kanga inogo. NDPP ya jenjang

teküpoktiba tashi nung lir aser political party tasen ka süaka nübertemi agizük, ta pai ashi.

"Party lennirtem longjemtsüla aser tangatetep nung party aser constituency atema inyaktsüla. Nenoki ni kija metoktsütsüla kechiyong MLA kati nangzükba inyaktsübaji asenok ajak indang tebilemstü khuret lir aser asenok longjemer constituency ajungketdi" ta Advisor Khamo-isa ayongzük.

Lanurtem tashi itdaksütsüla aser entrepreneurship nung tetsüng ajemoktsüla. Sorkar mapa mali kumogo aser lanurtemi tetoktepbatem ajangettsüla, ta paisa ashi.

NDPP-i tekaraba nung Naga yimten latettsü atema süoki ia inyakar ta NDPP Working President Nuzota Swuro-ia ashi.

Paisa party züngsemtem dang party tangatsüba sülen anidaktsü aser sorkar inyakba mapa ajak nung yariteptsü ayongzük.

Mizo teloktemi Amit Shah dang Manipur atema mepir

Aizawl, May 15, 2023 (Agencies): Mizoram nung civil society teloktemi Union Home Minister Amit Shah dang Manipur nung yimjung bener arutsü aser tensa azioktsü atema ayongzükogo.

Mizoram NGO Co-ordination Committee teshimtet telok kati Hombarnü New Delhi nung Amit Shah den ajurutep aser Manipur nung Zo mesüra Kuki kintemi timtem ajuruba indang osang lemsatop.

Centre aser Manipur sorkartemi lisopurtem nem takoksa anguba atema teyari agüjang ta NGO Co-ordination Committee-i Union Home Minister dang ashi.

Parnokisa Centre sorkar dang mepetmesü adokba tesemtem

nung paramilitary forces talila mapa lemezüksütsü atema ayongzük.

"Civilians kumzuka ayutsü aser state nung yimjung bener arutsü aser tensa süngjemtsü atema Centre sorkari Manipur dangi paramilitary forces talila yoktsüla. Iba ajanga ozüng alema inyakertem noktangtsü aser nübertem lendong balala nungi kumzuka ayutsü" ta NGO Co-ordination Committee-i metetdaksü.

Parnokisa Centre dang Regional Institute of Medical Sciences (RIMS) dena shisaliok reju balala nung azüngertemi Manipur toktsür aoba atema pei pei state nung maneni zünga otettsü atema mapa inyaktsü mepishia metetdaksü.

Manipur CM Biren-i Kuki nungeri akhangba magizüker

Imphal, May 15, 2023 (Agencies): Manipur nung Kuki nunger aliba district tem balaka razüka aotsü akhangba magizüker ta Chief Minister N Biren Singh-i Hombarnü ashi.

"Manipur litsü kumzuka ayutsü" ta pai ashi.

BJP MLA 7 densema MLA 10-i tawa tu parnok balaka razüka aotsü atema takhangba agüja lir.

Union Home Minister Amit Shah den osang lemsateptsü atema CM Biren Deobarnü Delhi-i ao.

'Suspension of Operations' nung sign sütepa aliba telungpurtem parnok designated camps-i meyipa arutsü atema mapa inyakdar ta Biren-i Shah dang ashi.

Tan ita tetenzüklen Meitei aser Kuki nunger tsüngda mepetmesü adokba sülen nübertemi lungkak aitba sentong ayonga magitsü mepishir, ta CM Biren-i metetdaksü.

Telok kari Manipur nung

highways noktanga aliba lapoktsü atema tashiyim mamshitsü saka parnok den angatetteptsü merangtsü, ta paisa ashi.

Manipur indang litsü kumzuka ayutsü aser Union Home Minister Amit Shah lenisüba kübok SoO (Suspension of Operations) teloktem pei pei designated camps-i aotsü atema mapa inyakdar, ta Biren-i shisem.

"Kü den minister tem Delhi-i oa Amit Shah den osang lemsatepogo. Pa dang Manipur nunger tebilemba shiogo aser tawa lendong nung telungpurtemi shilem agiba osang lemsatepogo" ta paisa metetdaksü.

Meitei aser lisopurtem tsüngda mepetmesü adoka raratepba sülen Manipur nung Chin-Kuki-Mizo-Zomi nunger MLA 10-i ketdangsüba balaka meshiogo.

Ozüng alema inyaksangshiba nung Kuki nunger telungpurtemi shilem agia asü masü ta

osangbeneri asüngdangdang "Army aser tanga security personnel-i 'Suspension of Operation' nung adenba Kuki telungpurtem indang designated camps semdanga odar" ta CM Biren-i langzü.

"Tai maketba nisung aika süogo aser kiojentem raksatsüogo. Onoki takoksa angurtem yaritsü atema mapa inyakdar" ta paisa ashi.

Ozü sorkari Manipur nung yimjung bener arutsü atema temulung agüja inyakar, ta paisa shisem.

Manipur lendong nung nisung 73 asü, 231 yiru aser kiojen 1,700 raksatsüogo. Kiojentem rongnung tamangba yimsü dak sendakba kitem dena lir, ta ketdangsürtemi ashi.

May 13, 2023 aonunga ozüng alema mapa inyak. Bishnupur district kübok Torbung nung telungpur ta temulung melemi bilemertemi injang khaloktsü aser ki 10 rongdoktsü, ta ketdangsürtemi ashi.

Siddaramaiah-i Karnataka CM inyaktsü akok

New Delhi, May 15, 2023 (Agencies): Deobar nikongdang Congress Legislative Party senden amendang party high command nem Chief Minister shimdaksütsü bangjemtep.

Hombarnep nungi Karnataka nung Chief Minister inyaktsü atema arishi kum 75 tain Siddaramaiah shimtsü akok ta osang jembir.

MLA 80 temai D.K. Shivakumar dang nungibo Siddaramaiah aginür ta ashir ta osang angazüker. Iba ya All India Congress Committee (AICC) nungi observer anati secret ballot agiba ajanga metet.

Taoba chief minister Siddaramaiah shimtsü ama akumba sülen Shivakumar-i tanep osangbener den pa

tebilembatem lemsatop.

"Congress high command aser talisa Gandhi'er kibongi takok tulu anguba atema kü dang yimya tajung sayutsüla aser pelatsüla" ta Shivakumar-i ashi.

"2019 kum Congress MLA 17-i party toktsüba sülen Congress-Janata Dal (Secular) teloktep sorkar loksatsü akum. Idangji Sonia Gandhi-i kü nem Karnataka state unit lenisütsü mapa lemezüksü. Ni temulung ila mebilemi meranga inyaka aru aser iba ajanga takok tulu nguogo" ta paisa ashi.

Ajisüaka, AICC-i Siddaramaiah nem ang Chief Minister inyakdaksünür kechiyong pa ya Congress MLA teimbai sapur. Ano, Siddaramaiah ya Karnataka nung nisung aikati saklokba

lennir ka lir. Karnataka nung election surveys aikati chief minister inyaktsü atema Siddaramaiah ya nübo tajungba ta nübertem ashiba bushitetogo.

AICC lennirtemi Siddaramaiah aser Shivakumar na Delhi-i jaok. Ajisüaka Shivakumar-i pa temang majungba ajanga Bengaluru toktsür maruteter ta dang osang sangoktsü.

Shivakumar-i pa tangatetba tajung aliba nisung ka lir aser Congress toktsütsü tebilemba mali ta shiogo.

AICC-i Siddaramaiah ya chief minister inyaktsü shimra Shivakumar nem deputy chief minister menden agütsütsü aser cabinet nung portfolios tongti aika lemezüksütsü akok ta osang angazüker.

Article 370 ya khen atema yangluba liasü: Amit Shah

New Delhi, May 15, 2023 (Agencies): Jammu and Kashmir nem jenjang balaka agütsüba Arrla 370 ji tetenzük nungi khen atema yangluba dang liasü aser Constitution yanglurtemi kanga dang shisa kaa iba arrla enoksem ta Union Home Minister Amit Shah-i ashi.

Iba osang ya Amit Shah-i Hombarnü Legislative drafting indang training programme ka lapoktsüdang ashi.

Centre nung BJP sorkari 2019 kum Arrla 370 agien aser linük

ajungai iba Constitution nung iba ya medendaktsünüa liasü, ta Amit Shah-i ashi.

Iba arrla yangludang "Temporary Provision of Article 370" ta zülua lir. Constituent assembly nung iba Arrla atema o atsütepaka menü print masü, ta paisa ashi.

Iba Arrla yanglurtem aser constituent assembly nung adenertemi kanga dang shisa kaa enoksem aser parnoki kanga bilemdanger "temporary" lung enoksem, ta Shah-i metetdaksü.

"Constitution nung arrla ka khen atema (temporary) mesütet aser yanglushitsü akok. Nenoki tanü Constitution tejenba züngdangra Temporary Provision of Article 370 ta jangjajangja zülua lir" ta paisa ashi.

"Arrla 370 joko mali. Ibaji agienogo saka index nung 'Temporary Provision of Article 370' ta zülua lir. Iba 'temporary' olung ya mezülü asübo kechi atalokla. Constitution nung arrla ka 'temporary' sütettsü asü" ta paisa asüngdang.

Manipur nung sepaitemi tensa azüoktsü meranger



Manipur nung tensa azüoktsü mechi Assam Rifles nungi tetsür sepaitemi tesem balala semdanga jajadang tetsürtem den ajurutepa sensaksemba noksa nung angur.

Dimapur, Monupii/May 15 (TYO): Army temi state sorkar aser lokti tentet balala den shisa agitepa "Together for Peace in Manipur" omen nung ajemdaker Manipur state yimtiba, Imphal tezülen alirtem aser kin balala tsüboa aliba yaritsü asoshi security mera balala agia arur, ta PRO (Defence) Kohima & Imphal indang sangdong ka ajanga ashi.

Manipur nung tesunep yimjung lidaktsütsü meranga sentong balala ayongzüka inyaka arur. Akhi ama tensa dangi arudaktsütsü mechi Army aser Assam Rifles column 128, Unmanned Aerial Vehicles & RPAs tem am mang-sangwa

melie tanükba agütsür, ta ashi. Mapang talanglang patrols senzür, nüngdakba hadir bener Assam Rifles nungi tetsürtem state sorkar den osang agitepa tesüiba ghonda 72 tashi tongtipang tesemtemi yoka anüker.

Parnoki yimtsüng balala sema jajar, yangji alirtem den sensaksem akar aser parnok kumzüka ayuba kising masü saka nüngdakba osettsüset agütsür, ta sangdong ajanga ashi.

Para medics temi nüngdakbapur nem medical teyari agütsür, prophylactic medical evacuation mapa inyaker, ta ashi.

Saparmeina nung

mangatetep kar a dokba security forces temi telangzüba agüja tensa azüoka liasü. Tesem balala nung aliba nüburtimi yimjung aginüba lemsateper.

Kasa mapang anüngdang aser aonung patrolling senzür, lendong atalokba tesem mita anüker, Manipur tesem balala nung aliba CSO tem den ajurutepa jembishinü akar, quadcopters, trackers dogs aser UAVs tem yoka tesem balala repranger.

Iba mapang telungpur telok nungi timtem magütsütsü mechi Indo-Myanmar arütsü kanga junga anüker aser ibaji ajanga Manipur nung tensa tajungba lir, ta sangdong ajanga ashi.

Mokokchung DPDB senden thinener

Dimapur, Monupii/May 15 (TYO): Deputy Commissioner & Vice-Chairman, District Planning and Development Board (DPDB), Mokokchung, Shashank Pratap Singh IAS ajanga sangdong ka nung ashiba agi, mepaidoktetba tensa kar ajanga DPDB Mokokchung senden May 17, 2023 nü amentsü

aliba May 20, 2023 nüi thinener. Iba senden ya May 20, 2023 nü anepdang 11:00 ako nungi tenzüka Deputy Commissioner, Mokokchung indang Conference Hall nung amentsü. Anungji züngsem ajak iba senden nung medema arua adentsü ayongzüker, ta sangdong ajangasa ashi.

Tetsür cyclist kati DC Kohima ajuru



Kohima DC, Shanavas C. IAS aser EAC Kezocha, Molosangla den Aasha Malviya ajurudang tanokba noksa nung angur.

Dimapur, Monupii/May 15 (TYO): Madhya Pradesh indang Rajgarh district kübok Nataram yimtsüng nungi 'Traveller, Mountaineer aser Athlete', Aasha Malviya, shiba "Sampoorn Bharat Yatra" nungia agütsür kising cycle nung senzer, lai May 15, 2023 nü Kohima tonga Deputy Commissioner Kohima, Shanavas C. IAS den ajurutepa liasü.

Tetsürtem kumzüka ayutsü, awareness agüja, tourism sector nung tetsürtemi tali

shilem agütsü ajungmesoa aser India ya "Safe Destination for Women" kumdaktsütsü nükjidong nung Malviya ya tesem balala sema jajar.

Aasha-i iba sentong ya Madhya Pradesh Foundation Day nung November 1, 2022 nü Bhopal nungi tenzüker aser New Delhi nung September 29, 2023 nü tembangtsü.

Malviya ya Nagaland nung May 16 tashi alitsü aser iba sülen Manipur aser Mizoram leni aotsü.

Tuensang nung Tribal Artisans Mela tenzüko

Dimapur, Monupii/May 15 (TYO): Deputy Commissioner, Tuensang, Nokchashashi NCS ajanga May 15, 2023 nü Town Hall, Tuensang nung Tribal Artisans Mela lapoktsü. Iba mela ya ananü alitsü aser Tribal Co-operative Marketing Development of India Ltd (TRIFED) ajanga District Administration Tuensang den lungjemer ayongzüka alitsü.

Ministry of Tribal Affairs, GoI ajanga iba ama sentong

ayongzüka atema DC Tuensang ajanga pelaba lemsatep, koba district nung tang mezüngbuba lir.

Nagaland nung Handicrafts aser Handlooms maparen ya aiben yimdak-yimtsüngtem nung amenoka alir, aser iba ama mela ayongzüka ajanga local artisan temi pei sasa yanglutetba osettem dangar dang sayutsü maongka agütsüba kising masü saka alima dang ayoktsü sapang lapoktsür, ta pai ashi.

Tuensang District ya Land of Culture asünung, artisan temi pei sobaliba wazüka ayur aser market tesendaktep ajanga parnoki yanglutetba osettem temaba jenjangi ajungketer, ta pai ashi.

Iba sentong nung SHG nungi Lotus Sangtam, Nagendra Nath Jah, SM, TRIFED Minister of Tribal Affairs nungeria jembia aser Asif, Senior Programme Officer TRIFED ajanga melepzüing o jembia liasü.

Naro metsürtem atema sorkari sentong yanglutsü

Dimapur, Monupii/May 15 (TYO): Nagaland Flower Growers Society kübok Kohima nung May 13, 2023 nü naro sayuba aser ayokba sentong ka Advisor to Chief Minister & Chairman, IDAN, Abu Metha-i semdanga liasü. Iba mapang pai naro industry dak sendakba ken o tem jembia aser Chief Minister lenisüba kübok state sorkari industry ajungkettsü aser Nagaland nung naro metsürtem takum tajungba kumdaktsütsü asoshi sentongtem yanglutsü ta ashi. Nagaland rongsenketzüng

nung yaritsü aser alima dang Nagaland tajungtiba sayutsü asoshi naro industry nung teimla lir, ta pai ashi.

Naro metsürtem den sensaksemba mapang, Naga nung aser talisa tetsürtemi naro kanga meimer, ta Metha-i ashi.

State sorkar aser lokti tentet balala lungjemer tarutsü nung sentong tajung kar yanglua inyaktsü imlar, ta pai ashi.

Metha-i Nagaland Flower Growers Society den sensaksem aka aser parnoki timtem ajangshibatem indanga jembia liasü.

AR-i Manipur nung nükpoker tanur 45 kumzük

Dimapur, Monupii/May 15 (TYO): Manipur nung azüdokshi aser rongrongshirong süngjema aodang Army aser Assam Rifles temi tasü ita nüburtim asoshi mapa tajung inyakba otsü temai adoker.

May ita tetenzüklen Manipur nung mepetmesü adoka lia sepaitemi Mission Blind School, Kakching nung azünger nükpoker kaketshir 45 den teyariteper tem kumzükba mapa inyaka liasü.

Mission Blin School indang principal K Parenag Kom-i mepishiba ama Assam Rifles indang security column ka item tanurtem aser teyariteper tem

kumzüki oa liasü.

Parnok ya Kakching garrison bushia anir arua yangji anisüngzük, chiyongtsü aser anisüngzüktsü tesem agüja liasü. Iba sülen kinungertem den osang agiteper Assam Rifles temi item tanurtem ya May 13, 2023 nü pei-pe kidangi yoka liasü.

Assam Rifles temi iba ama mapa tajung inyakba atema Mission Blind School indang principal K Parenag Kom aser tsürabortemi pelaba lemsatepa liasü.

Iba ama tensa nung Assam Rifles temi mapa tulu aser tajung inyakba atema parnoki pelaba lemsatep.



Mokokchung Traffic Police-i Mokokchung town tesem balala nung nüburtim timtem meli-i jajadaktsütsü aser gari amshirtem gari shitak anena ayutsü (traffic signs & markings) aser yimti tobur junga ngudaktsütsü asoshi maparen balala inyakba mapang tangokba noksa nung angur. Gari anishirtemi "No Parking" nung gari anenba yimya ya kanga majung aser 2 wheeler amshirtemi speed nung gari ajangdangtsü (overtake) merangba itemji azüoktsüla aser gari amshir ajaki traffic ozüng nung tashi angatsüla, ta iba osangbeneri Traffic Police, Waimeren den jembidang ashi. (Mokokchung, 13th May, 2023)



May 15, 2023 nü Patna nung Bihar Governor, Rajendra Vishwanath Arlekar-i ketdangsüa Justice Annireddy Abhishek Reddy Patna High Court nung judge inyaktsü atema tenangzükba agidaktsüdang tangokba noksa nung angur.

Karnataka nung CM Siddaramaiah aser Deputy CM Shivakumar asütsü

Bengaluru, Monupii/May 15 (Agencies): Congress Party-i Karnataka nung Chief Minister menden atema taoba mapang chief minister, Siddaramaiah shimogo aser Karnataka Congress unit Tir, D K Shivakumar deputy chief minister shimogo.

Karnataka assembly election nung Congress-i takok anguba sülen chief minister shimtsü atema party bangdak-i Congress national Tir, Mallikarjun Kharge nem tashi agütsü.

Party Tiri shimba Congress observer tem Delhi nung ajuruba sülen parnok central lenirtem-Mallikarjun Kharge, Sonia Gandhi, Priyanka Gandhi Vadra aser Rahul Gandhi nung den senden mena Karnataka CM Siddaramaiah aser deputy CM, D K Shivakumar shimba metetdaksütsü.

Siddaramaiah aser Shivakumar nata Delhi-i aotsüa

akok, ajisüaka bangdak lenirtemi jaok nung ang tena Delhi-i aruba tajungba asütsü ta tuyuogo.

Osangbener den jembidang All India Congress Committee (AICC) in-charge of Karnataka, Randeep Singh Surjewala-i, party Tir Mallikarjun Kharge-i kobi melii Karnataka chief minister tenung official süa sangdongtsü, ta metetdaksü.

Amongnü aonung tesü Bengaluru nung Congress MLA tem den senden amenba sülen Surjewala-i, "Party lenirtemi telemtetba agütsü. Kharge ya lenir tain aser pa ya Karnataka nungi lir. Kobi melii pai sangdong agütsütsü," ta metetdaksü.

"Takok anguba party-i mezüingbuba cabinet senden nung onoki mezüing nangzükba onük pongu mapa küma inyaktsü atema jembitsü," ta paisa metetdaksü.

Congress Legislature Party (CLP) senden nungji Karnataka Chief Minister shimtsü atema party Tir Kharge nem tashi agütsütsü atema bangzüng ka renema liasü.

Amongnü aonung Bengaluru nung aliba CLP sendenji Hombarnep 1:30 ako tashi amen aser iba senden nungji MLA 135 prongla aden. Kasa senden nungji taoba mapang Maharashtra chief minister Sushil Kumar Shinde aser party lenirtem- Jitendra Singh aser Deepak Babaria nungera observers ama denogo.

Iba dak alia Party lenirtem-Siddaramaiah, DK Shivakumar, KC Venugopal aser Jairam Ramesh nungera senden nungji aden.

2024 küm state nung Lok Sabha election atema tongti nüboyimerji Siddaramaiah asütsü aser tongti ketdangserji Shivakumar shimtsüa akok.

PM Modi-i mapa nung shimokba shidi 71,000 lema agütsütsü

New Delhi, Monupii/May 15 (Agencies): Mongolbarnü Ato kilonser, Narendra Modi-i sorkar department balala nung mapa nung shimokba shidi 71,000 lema agütsütsü aser pai video conferencing ajanga parnok den jembitsü.

'Rozgar Mela' sentong ya linük tesem 45 nung agütsü aser iba sentong nungji central sorkar aser state sorkar department balala nung mapa nung shimokba shidi agütsütsü.

Linük tesem balala nung tang mapa nung shimokba tasenpurtemji post balala nung shimoker- aser item rongnung gamin dak sevaks, inspector of posts, commercial-cum-ticket clerk, junior clerk-cum-typist, junior accounts clerk, track maintainer, assistant section officer, lower division clerk, sub divisional officer aser tax assistants densema lir.

Rozgar Mela ya akok tashi mapa aika adokdaksütsü atema

Ato kilonseri mangdang yur inyakba sentongtem rongnung ka lir, ta ketdangsertemi sangdong ka ajanga metetdaksü.

Tang tasen mapa nung shimokertemi Karmayogi Prarambh ajanga training agütsü atema maangka angütsü. Iba ya sorkar department balala nung tasenpurtem atema online orientation course ka lir, ta kasa sangdong ajangasa metetdaksü.

India nung coronavirus agi shirangertem kanga ajema kümogo

New Delhi, May 15 (Agencies): Tesüiba ghonda

24 tsüingda India nung nisung 801 dak dang coronaviurs putet aser tang linük nung coronavirus agi teshirangdakpurtem kanga ajema kümogo, ta Hombarnep Union Helath Ministry-i metetdaksü.

Tang India nung covid agi teshirangdakpur 14,493 dang kümogo.

Tesüiba anogo ka tsüingda India nung ano iba tashidak agi shiranger nisung 8 asü aser tang tashi nungbo linük nung iba tashidak agi asür ajak senteper 5,31,778 jungogo.

India nunga coronavirus wara prok tenzükba sülen tanü tashi nung nisung crore 4.49

(4,49,81,475) dak coronavirus putetogo.

Tang iba tashidak agi teshirangdakpurtem ji coronavirus caseload nungi shilem 0.03 dang lir aser iba tashidak agi shiranger anepertem shilem 98.78 jungogo, ta health ministry-i metetdaksü.

Linük nung iba tashidak agi shiranger ajak senteper 4,44,35,204 anepadokogo aser iba tashidak agi asürtembo shilem 1.18 dang lir.

India nung coronavirus vaccination tenzükba sülen tang tashi nung coronavirus vaccine dose crore 220.66 dak tema agütsüogo, ta health ministry-isa metetdaksü.



May 15, 2023 nü Jammu nung State Investigation Agency (SIA) ketdangsertemi ki ka mita aodang tangokba noksa nung angur.

2047 küm tashi nung India ya terenlok linük ka akümstsü: Rajnath Singh

New Delhi, May 15 (Agencies): Hombarnü

Defence Minister, Rajnath Singh-i, 2047 küm tashi nung India ya terenlok linük ka akümstsü, ta metetdaksü.

Maharashtra kübok Pune District nung Defence Institute of Advanced Technology (DIAT) convocation sentong nung jembidang Rajnath-i, India ya tangar dak memetaloki pei sasa litetba linük ka kümdar aser 2027 küm tashi nungbo India ya alima nung rongsenkettsüng tulutiba linüktem rongnung jenjang 3buba akümstsü, ta metetdaksü.

"Alima ya kanga kera melenshir. Defence sector nunga temelenshi adoker aser iba sector nung technical temelenshi aika lir. Defence sector nung timtem aika adokogo, talisa cyberspace nung amokmeren kanga bulua kümogo," ta pai ashi.

"Ajisüaka tensa mapang melenshiba ajanga asenoka technology nunga kanga kera ainer. Tayongzükba lira iba atemaji lenmang angur. Technology terenlok atema asenoki meranga inyaktsüla," ta pai ashi.

Tangar dak memetaloki alitsüji tongtibang, ta shia Rajnath Singh-i, "Iba tetezü

asen linük ya tangar dang nungi balaka asütsüla, ta masü saka nungdakbatembo asenoki yanglutettsüla aser tanga linüktem dangia yoktsüla," ta ashi.

Asen linük nung osset balala yangluba ajanga mapa aika adokdaksütettsü, ta shia pai, "Ato kilonser Narendra Modi lenisüba kübok onoki mangdang ka nguogo, aser ibaji 2047 küm tashi nungbo India ya alima nung terenlok aliba linük ka akümstsü mangdang lir," ta metetdaksü.

Rajnath Singh-i, "Asenoki defence osset balala tangar dangi yokba jenjang tajungba kümogo. 2014 küm iba sector (defence) nung tangar dangi sen crore 900 jenjang osset yoka liasü saka tangbo sen crore 16,000 jenjang yoker," ta metetdaksü.

Tangbo asen linük nung rifles, missiles aser tayimtsü yanglur aser India ya tangar dak memetaloki pei sasa litetba linük ka kümdar, ta pai ashi.

"Economic tsütsü mongintemi 2027 küm tashi nungbo alima nung rongsenkettsüng tulutiba linüktem rongnung India ya jenjang 3buba akümstsü ta shiogo. Iba mangdang ataloktsü atema asenoki inyaktsüla," ta paisa ayongzük.



New Delhi, May 15, 2023: Delhi nung ki bendoktsüba anema Hombarnü New Delhi nung Jantar Mantar anasa Tuglakabad Fort nung takoksa angurtemi parnok nem tejenokdak ki agüjang, ta takhangba agüja longkak aitba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 16, 2023

ILP ya asenok mapa

Nagaland-sa süaka Dimapur nungbo ILP mamshii aru, anungji India len nungi tarurner ajak arua küm ishika ayanga mongerbo bendanger aika pei atema ali kimong alia teti asoshi kiojen yanglua lisopur o bendanger na mebendangtet lia arudagi. Iba ama mapang ka nung menur süaka Nagaland government-i Dimapur nung ILP amshitsü atema ozüing lateta lir. Ano, tangbo Dimapur agi District asem kuma Niuland aser Chumoukedima na razüka aonungji, item ajak nungji Nagaland nung senso masürtembo ILP nungdaker. Ajisüaka, tang tashi nung Dimapur telongi aitba Nagaland süngküm nung ILP mita repringba mangur aser Dimapur yimti nunga government-i ILP ozüing mapa kuma inyakba memeteter. Ashiko, mapa tasak aser tarendaktsü aliba mapa asüba agi ILP ozüing ya Dimapur nung mapa kuma inyaker mali aküm südi. Iba ama mapang ka nung, Dimapur nung Nagarjan kiyong ta ajaba tesem nung aliba Kuda yimtak parnok putu mendeni Kuda yimtsüing telongtet nung alir bendanger ajak dang June ita 12 tashi nungbo parnok shia ket nung ILP shitak alitsüla ta metetdaksüba osang jagi bendangertem nem dang masü saka asenok lisopurtem nema teinyaktsü rongdak nungdak mapa ka nenshia metetdaksür. Atangji, ILP ozüing mapa kuma inyaksüba ya state government mapa, kechiyong ozüingji state government-i latet. Ajisüaka, tatar senden nung ozüing latetba o tatar senden senshir ozüingji mapa kuma inyaksüba naji balala, ashiko aiben tebang o agi ozüing latettsüabajibo temela asütsü saka jembiba ama temulung nung tangatetba melira mapa kuma inyaksüabajibo tasak asütsü. Nagaland nung ozüing aika yamaji ser mapa kuma moutet pangdaka kar aser karbo mapa kuma meinyaktet meshimeshia agienogo. Iba ama government tashi maitba tia repringteta nübertemi pei alidakbo pei lima kümzüksü aser pei nübertem ajangzüksü asoshi tashiyim agi masü saka ozüing nung shia aliba ama yimteni sentong yanglua inyaksüla. Iba amaji inyaksü mera shitak agibaji, tang Kuda putu mendeni bendangertem dang government office nungi ILP meshitsü metetdaksüba asütsü. Aji oda, Kuda putu mendeni ILP agütsütsü ta masü saka state government-i latetba ozüing sülen timi anidakdaksür. Iba sülen government-i ILP shitak ali mali mita repringtsü mekokra ano ajia yimtak putu mendeni repringtsüla, kechiyong ibaji pei lima bendanger ket nungi kümzüksü asoshi inyakba mapa ka lir. Ibaji dang masü saka yimtsüing nungbo Nagaland Village Council Act ajanga putu menden nem pei yim lendong timtem nungi kümzüka inyaksü asoshi tashi agüja lir. Iba kasaji mesüaka Dimapur, Kohima aser Mokokchung ama town-tem nung kiyong aser mepu mesüra ward balaka lemsaa lir aser item kiyong, mepu mesüra ward shiaji yimten lir, anungji item yimtentemi pei pei kiyong, mepu aser ward nung Kuda Village Council-i inyakba amaji ILP ozüing mapa kuma inyaksüba pei mapa aser pei khuret kümer inyakra, iba jagi asen lima bendanger ket nungi teti asoshi kümzüksü. Atangji, tesem tesem nung kaketshirtemi khen khen ILP mita aoba angur aser idangji government-i itemji kaketshir telongjem mesüra lokti tentet mapa masü ta aitsür, ajia shitak. Ajisüaka, kibo aronger saka teinsepi shinga marur ta asüba tensa tia nung, kidang kiyongertembo Fire brigade gari aru dang ataa alitsü asü mesüra peisasa miji remseptsü merangtsü ? Tanü Nagaland nung ILP ozüing tiaji aji mesüka lir. Küm ter tejakdang khenbo Nagaland-i bendanger raliwalirtem sademsadema aruagi amongtsü atema Inner Line Permit mamshiang tajungba ta Naga nung yimsüsürtemi anir jembiba angashiogo. Ajisüaka, meyiper Manipur nungbo ILP mamshi asüba küm ishika jakdang nungi ILP amshi tenzükogo, anungji tangbo asenok Imphal- leni inü nunga ILP nungdaksü. Aji oda, Manipur nungbo bendanger mashii arua melidaktsütsü atema ILP amshi tenzükba ajanga ayanger aser raliwalirtem nungi ILP fee nungi sen crore dak tali aazükba indang government senotsü aruba osang agütsü dang meteter. Kasaji Meghalaya nunga ILP amshitsü akangba asenoki angashir. Item osangtem jagi danga asenok saksalemdaktsütsüla aser ano talila memenu dang yimtsüing, kiyong aser mepu shia nung pei pei yimteni ILP ozüing ya mapa kuma benshia tenzüksüla.

OLEMSABANG

NAGA NUNGER YASHI, TANÜ ASER ASÜNG INDANG

~ B. Wati Jamir Arkong Ward, Mokokchung.

(Yashi adok nungi...)

Aji oda Naga anungeri maremtet ola tulu adoka nüchiso bushiba maparen tenzük. Naga kin rongnung tangar kinji toktsür Aor saseb nung kodang repringdangdir, Yisu Khrista yimsü tajung ya arur-a pusu (Putu) shia timtem balala ajurua aruba, aji asenok yimtsüing shia nübertemi meteta lir. Kasaji tanga Naga kin shiai timtemji ajurua lir aser aji tanü tashi lir. Khrista yimsübo agizük, saka külen ano British yimsüsüba den India tasa (policy) tamajung ajak tamalen shisemba ama 1914-1918 alima ajunga mezüingbuba rara (world war I) nung Naga nungertemi pungmang lima nung nemzür ama tangar khu bener koba lima nung jajar memetet langtem agir aoba ajak agizüka/semzüka toktsür padelong (halfpants) melena semdaksür amangsangwa maka jajaba otsü asenoki anagashir. Ano iba rara tembangba den külemi Naga nüchiso tongpang tenzük, iba nungia Aor ta tang masü Naga kin ajunga timtem tulu ajurua aru. Ozü yim saseb nung kodang repringdangdir Rionsanger Pusu nung mezüingbuba alima rara (World War I). Par pusu nungsa ano nüchiso tongpang (Naga movement) tenzükatimtem tulu ajuru. Ano kodang Rionsanger pusu Medemsanger pusu-I atsüing/melen, idangji ano alima rara (world war II) 1944 nung tenzük aser ano par pusu nungsa India nüchiso (Independent) ngur külen ano Naga lima nung American missionarytem lia aliba Indian armytemi aridok/meindok (expelled/driven awat) (odaktsü ta masü) missionarytem Naga lima nung lirabang India nungeri Naga lima nung Naga nunger dak parnoki bilemba ama meinyaktetsü ta bilemer American missionarytem par limai arizüka yok. Ibaji 08/02/1955 nung Rev. & Mrs. R.F Delano pa aser par kibong teti atema aridok. Iba sülen dang Nagaland nung AFSPA inyakyim sangdong, yim asem-pezü septepa yim ka nung lidaktsü (grouping). Naga nunger ajunga rishikangshi tenzük, iba grouping nung Naga nunger timtemji ulura liasü ta ashir. Yangi tongmelang agi tera ashir/agütsür, saka "Ao Lima Nüktzü" Tiala Imcheni züluba kaket nung tejangjaba angutsü. Tamalen shisem ama India nunger inyakyim/tasa (policy) ji Naga lima ajungaji India kübok ayutsü, iba den ano tamangba yimsüjia Hindu/Hidutva yimsü amangdaktsütsü nükjidong ana dak rangloker inyaka aruba mapang Aor rongnunga par tamangdir tsürabur Rev. L. Kijungluba-i anir NBCC ajanga par ochi tamang tulu agi timtem tulu arema Naga limaji Khrista asoshi (Nagaland for Christ) ta yimtena India nunger den raraa asen lima ya alangzüka ayu. Külen ano alima yimden yimli tsütsü Naga nunger nüchiso bushirtemi (freedom fighters) rara aruba tanü tashi. Par Medemsanger pusu nung aji oda lia arur Medemsanger pusui Mejsanger pusui atsüing/melen. Iba mapangjia Naga nüchiso bushir teloksa telok Naga lima kinük-kisang ajak nung Ak chanu apur amai India nungertemi pua ao. Aji Naga lima nung India Armytemi curfew sangoktsür puyonga ao.

Ano 1970s jia kanga dang tetsübuttsü jenti atalokyonga aru. Mejsanger pusu jia Mopungsanger pusui atsüing/melen aser inyaka lia arudang 1980s nungi 1990s tashi Naga nunger rongnung telemsa tulu adok. Iba mapangbo India army den masü saka Naga nunger o Naga nunger tsüingda rara (war) tulu adoka yimdong ajunga nung shiruru kaseter amai kasetyonga ao. Ano külen yimsüsürtem linük tenzükuri (freedom fighters) züka merenshiba tashidak amer aika süogo, masür rogojia item kara/ara amer lir. Medemsanger pusu nung nisungtem India armytemi azükba agi tashidak kaor süma, Mejsangerbo ano India army ketmong den Naga army ketmong agi kangshia süma. Aji oda tang Mopungsanger pusu Kosasangeri atsünger küm ishika tsübuseta atar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan kentener, Danielle-i American Idol nung Top 3 jenjang tongogo



Osangtajung kentener nungtugu, Lauren Daigle (abelen) aser Megan Danielle na külemi tangokba noksa nung angur.

May 15, 2023: Khristan osangtajung kentener, Megan Danielle-i kenten toktepba show American Idol nung Top 5 jenjang tongtetba sülen tang tesüsa Top 3 jenjang tongogo.

American Idol nung Top 5 jenjang atongertemji Megan Danielle den Wé Ani, Zachariah Smith, Colin Stough aser Iam Tongi nung liasü aser tang tesüsa Top 3 nung Danielle den Zachariah Smith aser Iam Tongi nung lir.

Arrshi küm 20, Danielle ya Douglasville, Georgia nungi lir. Lai "Head Over Feet" (Alanis Morissette ken) atenba sülen Top 5 jenjang tongteta liasü.

Danielle-isa Stough den külemi Ed Sheeran indang ken 'Dive' aten.

Taküm March ita nung Facebook video ka ajanga Danielle-i Hillsong United indang tekülem aser tetushi ken "Oceans" atentsü lia lai tajungshi o jembia liasü.

Laisa social media ajanga, "Yisu temeim lemsateptsü atema ni aso. Anogo shia ni tamakok nguaka, temenen menayonga aser tetemsü mesüaka ni tetemsü mekümmner," ta lemsatep.

"Alima sang nung ashitsüji melamelar aser Tsüngrem O nungi pilatsüji melamelar ta ni meteta lir, kechiyong alimai ibaji aginer. Ajisüaka ni nenok

dang ya shiner, ajak jungadoktsü. Tsüngremi asenok meimer aser asenoki Pa indang lemsateptsü nungdak," ta lai ashi.

Tamalen American Idol nung judge, Luke Bryan-i la dang, "Onoki nü ola meimba dang masü saka nai ajak den nü tamang jenjang indang lemsateptsü metsübuba ya onoki nükshir," ta ashi.

Iba mapang nungji Danielle-i la tebou nem akhüm agüja 'Go Rest High on that Mountain' ken tena liasü. La tebou asüpila sentong nunga lai iba ken tena liasü.

"American Idol" finale sentong May 21 aonung agitsü.

Khristan charity telok kati Congo nunger yaritsü ayongzüker

May 15, 2023: Congo linük nung tzümet süng lendong nung nisung noklang aika süogo aser meyirjang aika talidak mali kümogo.

Khristan charity telok Tearfund-i alima linüktem dang Congo nung tzümet süng agi kongshiba nüburttem yaritsü mepishir.

Brihostibarnü (May 11) nungi tzünglu sashia aruuba ajanga linük anüdoklen region nung ayong pezü nung tzü tali mobanga tzümet süng aser anentsüh lendong balala nung nisung 400 dak tema süogo aser nisung meyirjang aika talidak makai kümogo.

Iba dak alia tzümet süng ajanga Tenla kitem aser schools densema kiojen aika raksatsüogo.

Tearfund-i, rongdak süa teyari magütsüra ano nisung aika süadoktsü, ta metetdaksü.

Congo nung Tearfund otongdar, Hebdavi Kyeya-i, anentsüh aluba ajanga lenmang aika nokdangogo, ibayongji charity telok balalai teyari agütsütsü atema

lendong agi kongshiba tesemtem tonga mouteter, ta metetdaksü.

"Tearfund-i lendong atalokba tesem tonga aotsü atema anogo ananü tashi agia liasü. Anentsüh aluba ajanga lenmangtem mokdangba den apu aika chirepogo. Onoki rong ajanga dang awatsüng ajangdanga lendong agi kongshiba tesem tonga oteta liasü," ta pai metetdaksü.

Ki 2,000 dak tema raksaogo aser nisung 1,000 dak tema samar mangur.

Kyeya-i, "Tang rongdak süa kümzükbaba maparen meinyakra samar alirtem-a aika süadoktsü. Tang mapang ya mangyimba mapang lir, ajisüaka iba mapang ya lendong agi kongshibapurttem yaritsü mapang-a lir," ta metetdaksü.

Congo sorkari Hombar (May 15) ya mangyimba anogo asütsü aser asürtem nem akhüm agüja linük wakotem tom nung ang asongtsü, ta sangdong.

Kyeya-isa, tzümet süng lendong sülen cholera,

malnutrition aser dehydration ajanga nisung aika kongshitsü; asenoki tekaraba nung meyarira ano nisung aika süadoktsü, ta metetdaksü.

"Tzü temerük mangur anungjinisung aikati tzü majemer. Metsümeshiba tesemtem raksaogo anungji ramen poktetsü. Chiyungtsü peria mali anungji kobi melii nisung aika, talisa tanurtem aya agi asütsü," ta pai metetdaksü.

"Tearfund-i akok tashi nisungtem kümzüksü merangdar. Onoki joko shinga mesüdaktsüner, ibayongji kanga rongdak süa inyaker," ta pai metetdaksü.

World Meteorological Organisation-ia Africa tesem ajaklen temperatures tali atutsü aser tzünglu sashia arutsü, ta metetdaksüogo.

Tearfund-i alima linüktem dang tang rongdak süa Congo nungertem yaritsüla aser Khristantemi takoksa angurtem atema aser samar alirtem atema sarasademtsütsüla, ta ayongzüker.

ANOGO ABEN TSÜNGREM DEN

Ratamata tajangzük

- Rom 15:1-7

Tangatetba tajungi nisung ka ain adokba sotter; aser abelen ka odang toktsübaji pa sentsüwangshi (A. Shin 19:11).

Laishiba nung ojang ana tejangja lenmang nung melentepa amshir. Mezüngbuba, timtem mapang nung meranga nokdaksü Tsüngremi tashi agütsür. Tanabuba oji taremsük: nisung tamajung den inyaksü Tsüngremi tashi agütsür. Kodang na tia tasak nung lidir, meranga tizüksü sarasademang. Kodang nisung tasak ajurudir, taremsük asoshi sarasademang.

Shisa taka nisungi abelenji odang toktsür. Iba dang "tangar nem terataba tajangzük agütsüba" ta ajar. Abelenba ajak metetta inyakba mapa ta agiba jagi yirudaktsür, aremsükang. La /pa mapa obendangtsüba dang nungi, ne kiyonger tebilemba tajung sayutsü mapang agüjang.

Iba shin O temulung nung ayutsü tsüraburi junga inyaksüla. Aiben asen tanurtemi mapa tamajung inyaker. Tesülen abelenji iba tashi mejungi liasü ta angatetsüba tang tsüraburi azüoker. Tanurtem dang taremsük sayutsü tim. Tsüngremi asenok dang talangka aremsüker ta bilemtettang. Asenok Pa chirtem lir. Asenok temenen Kibuba Yisu Khrista dak mebenloktsü tashi, Tsüngremi asenok dang aremsüka ali. Tsüngremer tazüokbaji teti kümdanga aser bilemdanga amshir. Pai asenok dang aremsüker aser tatok agütsüba temeim agi benshir.

Oba, onok dang kati dang aremsüktsü sayuang; Yisu asoshi. Amen.

TDP party-i Andhra Pradesh nung Khristantem kümzüksü nangzük

Amravati, May 15, 2023:

TDP national general secretary, Nara Lokesh-i, Andhra Pradesh nung Jagan Mohan Reddy chief minister shimba sülen nungi ruling party lenirtemi ozüng alema sen crore meyirjang aika jenjang Khristantem meyong rejutem aser kiojen aika rakzükogo, ta metetdaksü.

Paisa, state nung Khristantem meyong kiojen aika ruling party nung lenirtem minister-i lenirtem pusemba agi lir, ta metetdaksü.

Khristan lenirtem telok kati Lokesh ajurua temepishiba onük aika agütsü; item rongnung Kurnool yimti nung pastor tem aser Khristan lenirtem senden amentsü atema community hall ka sütsütsü takhangba densema lir.

Iba senden nungji constituency in-charge, TG Bharat densema TDP lenirtema aika liasü.

Khristan lenirtemi temepishiba agütsüba sülen Lokesh-i, "YSRCP lenirtemi state tesem balala nung Khristantem meyong school buildings rakzükogo," ta

metetdaksü. Paisa, state nung TDP-i takok ngua sorkar kümra Khristantem meyong kiojentem kümzüksü atema party-i inyaksü, ta nangzük.

Lokesh-i, local MLA, Katasani Rambhupal Reddy-i sen crore 100 jenjang wafks ali acre 10.64 rakzükogo, anungji pai ozüng alema inyakba atema temerenshi agütsütsü, ta ashi.

Kurnool yimti kübok Labour Colony nung alirtemi Lokesh dang, iba kiyong nung nisung 5,600 shi alir ajisüaka sorkari ki ka danga mesütsü aser ki tax tasenba ajanga nüburttem kanga timtemer, iba dak alia parnok nem ration magütsür, ta metetdaksü.

Ajioda Lokesh-i, state nung sorkar tasen aruba sülen yangji alir ajak nem ki sütsütsü, ta nangzük.

Tesülen Lokesh-i Kurnool bus stand anasa matamabensar tsüngsem arürtem ajurua liasü.

Pai parnok dang, "Nenoki küm ka ata-a liang. Chandranna sorkar tanaben arutsü, iba sülen nenok timtem ajak sorkari reprangtsü," ta nangzük.

AO OSHI ANGAZÜKDAK: TANÜ ANGAZÜKTSÜBA OJANG



Puso

(n) külemi asor (contemporary)

* Onok pusopurtem aika tajung kümogo.

Putak

(v) anü nung kongdaksütsü ayu (sun drying)

* Asenoki anogo shia süoshi shitoker putaker.

OLONG PAITEP # 6516

Grid for OLONG PAITEP # 6516 with numbers 1-25 in various cells.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenung atlet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6515 TELANGZÜBA

TIPIEN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nungdak, 10. Yongya, 11. Kongro, 13. Ora, 14. Ata.



Agüja aliba noksa nung meputepi aliba 10 bushiang

Tanur asoba anogo nung salem osang den noksa angati adokdaksünura - Tenung, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenung :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Union Minister Sonowal-i NEIAH indang ki 6 lapoktsü



Union Minister Sarbananda Sonowal-i Shillong nung North Eastern Institute of Ayurveda and Homoeopathy (NEIAH) indang ki tasen 6 lapoktsüba angur.

Shillong, May 15, 2023

(Agencies): Union Minister of Ports, Shipping & Waterways and Ayush, Sarbananda Sonowal-i Hombarnü North Eastern Institute of Ayurveda and Homoeopathy (NEIAH) nung Project II indang ki tasen 6 lapoktsüogo.

"Tanü Shillong nung ki tasen 6 lapokba atema kanga pelar" ta Sarbananda Sonowal-i ashi.

"Iba ajanga NEIAH reju nung inyaksangshi tajungba akümtsü aser Northeast nung traditional medicine renloksü" ta pai ashi.

"Prime Minister Shri Narendra Modi lenisüba kübok asenoki modern medicine den külemi traditional medicine tejakleni bener aoer" ta paisa shisem.

"Asenoki tarutsü anogotem asen linük nung healthcare solutions delivery system nung mozü temeyoktep amshiba angutsü" ta Sonowal-i ashi.

"NEIAH-i kobi melii ambulance services tenzüktsü osang sangoktsür" ta paisa ashi.

NEIAH nung ki tasen 6 nung boys hostel ka, girls hostel ka, Type III quarter, Type IVA quarter, Type IVB cum Director's Residence, senior resident hostel aser guest house dena lir. Ki trok ya Rs 60.16 crores endoka yanglu.

"Mother Earth-i asen northeast kanga moatsüogo aser putu aika süngolio balala ajanga asenok taneptsü ngua arur. Iba maparen ya tejakleni bener onür aser nisungtem yarinür" ta Union Minister Sonowal-i metetdaksü.

"PM Modi indang alizüingji healthcare delivery system renloksüba lir" ta paisa shisem.

Financial year 2022-23 nung NEIAH indang OPD clinics nung shiranger 52,088 aru aser IPD patients ama nisung 504 anoika anepalu.

Ayurveda nunga NEIAH

indang OPD clinics nung shiranger 36,683 liasü aser IPD section nung nisung 482 anioka anepalu.

Homoeopathy indang OPD clinics nung nisung 19,397 aru aser 22 anioka anepalu.

Kasa mapang nung NEIAH ajanga health camps 35 aser CMEs (Continuing Medical Education) pezü ayongzüka agiogo.

NEIAH nung ki tasen trok lapokba sentong nung Health & Family Welfare Minister Dr Mazel Ampareen Lyngdoh, Animal Husbandry and Veterinary Minister AL Hek, Vice Chancellor, North Eastern Hill University (NEHU) Professor Prabha Shankar Shukla, Director, North Eastern Indira Gandhi Regional Institute of Health and Medical Sciences (NEIGRIHMS) Professor (Dr) Nalin Mehta aser Director, NEIAH Dr Neeta Mahesekar nunger aden.

Tripura BJP tribal front-i Rai Kachak atema akhanger

Agartala, May 15, 2023

(Agencies): BJP indang tribal front Janajati Morcha-i Chief Minister Dr Manik Saha dang Rai Kachak Museum lapoktsü mesüra Matabari indang kürakyanglu ka yanglutsü takhangba agütsü.

Iba ya Tripura kübok Gomati district nung yanglutsü akhanger. Rai Kachak ya Reang nunger Army general ka liasü.

"Tripura ya sobaliba, inyaksangshi aser senmang

nung takar lir aser Rai Kachak

nungeri tetsür tsüngrem den ajurutepba aser Arakans nung takok anguba otsütem lir" ta BJP Janajati Morcha state general secretary Devid Debbarma-i ashi.

"Tripura nung lisopurtem indang putiotsü aser sobaliba ya wazüka ayutsüla aser ajungkettsüla. Onoki Udaipur, Matabari nung Rai Kachak Museum aser kürakyanglu yangludaksünür" ta parnoki züluba memorandum nung shia

lir.

Iba ajanga Rai Kachak nunger sobaliba, subsolemtsü, osettem aser tangs sobaliba dak sendakba osettem sayutettsü, ta parnokisa ashi.

"Janajati Morcha Tripura Pradesh-i iba mapatong inyaksü atema nungdakba senotsü aser teyari agüjang ta mepishir. Iba ajanga asenoki Tripura sobaliba, senmang aser i n y a k s a n g s h i mesamadaksütsü" ta Janajati Morcha-isa metetdaksü.

Cyclone Mocha ajanga Mizoram nung kongshi

Aizawl, May 15, 2023

(Agencies): Deobarnü cyclone Mocha ajanga Mizoram kübok tesem aika nung kongshi aser idanggi kiojen 236 aser refugee camps 8 tashi nung teraksa bentsür arua liasü.

Iba ajanga nisung 5,749 timtemer ta state disaster management and rehabilitation department ktdangsürtemi ashi.

Onoki osang agitepdar aser ano talila raksarakbongba angashitsü akok. Ajisüaka

lending balala nung nisung yiruba osangbo mali, ta parnoki ashi.

Kiojen 236 nungi 27 kanga mejungi raksa aser 127 kanga raksa aser 82 terara raksa ta department-i metetdaksü.

Myanmar den arrtsüa aliba Siaha district nung yipru agi tamajungtiba kongshi aser idakji kiojen 101 raksa. Myanmar sensotem jenoka aliba relief camps 2 dena kongshiogo.

Maneni, Mizoram kübok

Lawngtlai district nung ki 79, Lunglei nung 35, Mamit district nung 8, Hnahtial district nung 12 aser Champhai district nung 1 raksa.

Siaha nung refugee camps 2 dak alia Lawngtlai district nung relief camps 3, Lunglei district nung 2 aser Hnahtial district nung 1 kongshiogo.

Cyclone Mocha ajanga tesem 50 tema nung nisung 5,749 tashi timtemdaksür, ta ktdangsürtemi ashi.

GOVERNMENT OF NAGALAND
OFFICE OF THE DIRECTOR GENERAL OF POLICE,
NAGALAND :: KOHIMA.

NO.PHQ (D-1)TENDER/CPR/23-24 Dated Kohima the May 2023.

NOTICE INVITING TENDER

Sealed tender is hereby invited for supply of the following Centrally Purchased Ration (C.P.R) for Nagaland Armed Police and Indian Reserve Battalions for the year 2023- 2024.

Table with 3 columns: Sl. No, Items, Approximate Requirement. Items include Tea Leaf, Dry Chilly (Red), and Milk Powder.

Interested tenderer(s) may collect detailed Tender Notice from Police Headquarters, Kohima, Nagaland (Supply Branch) on payment of Rs. 500/- (Rupees Five Hundred) only as application fee on any working days.

Applications shall be issued with effect from 16th of May 2023.

The last date of receipt of tender is 09th June 2023 till 1200 Hrs and shall be opened on the same day at 1300 Hrs in the presence of tenderer(s).

Sd/- (RUPIN SHARMA) IPS, Director General of Police, Nagaland: Kohima.

MOLUNGNEN O



07.08.1935 ~ 10.05.2023

Ozü tsürabur asür IMKONGYAPANG LONGKUMER (LONGJANG) (Retd.PA to DC) shirangba mapang nungi tasüba anogo tashi adianu, tembar, kiyonger, arogo, lokti tentet balala aser kija kibong shirnokisa ozü asüko mangyim mapang nung nübu, shisatsü, rongsen aser sarasadem ajanga yariogo, nenok ajak dang tepela tulu lemsateper.

Tulusang Tsüngremi nenok ajak maneni moajang ta ozü tamang sarasadem.

-Temeim Kinüngtsü, Chirnurtem aser Kinüngertem.

Office of the Kangtsung Senso Telongjem Tuli

Dist. Mokochung, Nagaland

SANGDONGER

Dated 07.10.2021 anogo nung Mr. Imsutemjen S/o. Shilutoshi (Kangtsung) aser Mrs. Lanusenla Imsong D/o. Lt. Mr. Imkongsua Imsong (Kangtsung) tena tsüngda koba ken-o High Court Kohima bench nung temeten agütsüogo aser kasa ken-o Mokochung Civil Court nung dismissed süogo. Ajisüaka, iba ken-o yimtsür yimer tsüngda asünung yimteni yimli tulu agüja aruogo, saka tanü tashi nung Mr. Imsutemjen nungi osang kecha malinung, mezüng obendang koba Kangtsung Senso Telongjem Tuli (KSTT) ajanga dated 07.10.2021 anogo nung senji magütsütetra ki aser kimong agütsü ta sign sütepa renemba ama KSTT-i inyaktüsü.

Anungji iba senji May 30, 2023 anogo tashi nung magütsütetra sign sütepa aliba ama Mrs. Lanusenla nem bendanga agütsütsü ta KSTT office ajanga sangdonger.

Sd/- TEMSUINBA President, KSTT

Sd/- MASAKUMZUK Gen. Secretary, KSTT

ALI TAYOKTSÜ LIR

Two Half pura per sq.ft. Rs. 25, From Commanding Junction 5 Minutes. Slightly negotiable Contact : 9863826159

Pakistan court kati ex-PM Khan kinungtsü nem bail agütsü

Lahore, Monupii/May 15 (Agencies): Lahore yimti nung court kati Hombarnü taoba Ato Kilonser Imran Khan kinungtsü nem graft case ka nung May 23 nü tashi bail agütsüogo, ta parnok indang legal team nungi okatsür kati ashi.

Khan ya linük indang anti-graft agency-i taoba hopta kasa ken o nung aija apu aser iba ajanga linük ajunga nung azütokshi longkak aita liasü. Linük rongsenketzüng kanga mejungi kümer aliba mapang ka nung pa apuba ajanga ano mepetmesü tulu adoka liasü. Pa apuba sülen anogo ishika lir chiokogo aser Islamabad nung court kati hopta ana atema pa nem bail agütsüogo.

Khan kinungtsü Bushra Bibi ya iba ken o nung pa den külemi aija liasü, koba Al Qadir University amenoktsü atema land developer ka ket nungi senotsü teyari agizükba dak sendaka lir. Iba University nung ya Khan aser pa kinungtsü na trustees lir.

"Onoki Al Qadir Trust Case dak sendakba nung Bushra Bibi atema bail ka asoshi mepeshia liasü aser LHC bench kati May 23 nü tashi bail agütsüogo," ta Bibi indang okatsür, Intizar Hussain Panjutha-i Reuters dang ashi.

Khan, shibai Lahore High Court-i pa kinungtsü meiner oa liasü, pai Hombarnü, sorkari pa anema inyaksangshiba nung

shilem ka ama pa kinungtsü dena aputsü meranger ta tsübuu bilemba lemsatepa liasü.

"Parnok sentongji ni maksütsütsü aser Bushra Begum tepuokdaki yoktsü atema lir," ta pai Twitter ajanga lemsatep.

Information Minister Marriyum Aurangzeb-i iba dak sendakba nung telangzüba agütsütsü asoshi mepeshiba kecha telangzüba magütsü. Sorkari iba ken o nung parnok densema mali ta ashiba den anti-graft agency aser National Accountability Bureau-i iba ken o benoka inyaksangshidar ta shia arudar.

Taoba küm Ato Kilonser mapa nungi atsüngtokba sülen Khan anema ken o 100 dak tema benoka lir aser iba ken o ya pa anema benoka aliba ken o rongnung ka lir.

Pa PM mapa nungi anentsüba sülen pai linük ajunga nung election agütsü ayongzüka sentong balala ayongzüka agia arudar aser pa aser par party anema inyaksangshiba atema military aija arudar, koba military-i magizüker. Taoba küm pa nüboyimba sentong ka nung shilem agiba mapang injang agi kha yirutsüogo.

Par party-i lemsatepba video ka nung Bibi mena aliba gari Khan indang security-i meketbanger aliba sayuogo.

Cyclone Mocha: Myanmar nung nisung trok süogo

Naypyidaw, Monupii/May 15 (Agencies): Deobarnü

Cyclone Mocha agi nisung trok takum samatsüba sülen Myanmar nung mitkar lenirtemi Rakhine state ya 'natural disaster area' ta sangdongogo.

Iba cyclone ya tang century nung Bay of Bengal anasa Myanmar aser Bangladesh nung kongshiba cyclone tashi tulutiba lir.

Cyclone Mocha ya alima nung refugee camp tulutiba, Cox's Bazar, Bangladesh nung kongshitsü ta tsüboa liasü, saka tang tashi iba tesem nung mokokshii lir.

Ajisüaka jenjang pongu buba nung aliba yipru yagi Myanmar tzükum nung kongshia ki noklang aika raksatsü.

Rakhine nung tenemoklen aser state yimtiba, Sittwe temeket nung tzünglu sashia aruba aser mopung tesashi aonba lir.

Sittwe yimti shilem 90 raksatsüogo, ta yangji alirtemi ashir. Mopung ghonda ka nung kilometre 209 tashi kera aonba ajanga poles aser süngdong laodakja communication line tem rakdang.

Iba yipru yagi Rohingya

nunger tesem balala nung jenoka aliba camp tem raksatsü. Myanmar anüolen Rakhine nungya küm aika kin balala tsüngta rara arua liasü.

Cyclone Mocha ya Myanmar nung Kyaukpyu township aser Bangladesh nung Cox's Bazar tsüngta tzükum ajanga Deobarnü anjongmeshi meta ajanga ao.

UN indang humanitarian assistance office ajanga ashiba agi, tang tzüngsang mopung majungba ajanga telecommunications nung timtem ajurua lir, anungji teraksa ajunga masadanteter.

"Ajisüaka tetenzüklen osang anguba nungi teraksa ya kanga ulura aser tesem balala nung jenoka alirtem asoshi teyari kanga nüngdaker," ta UN ajanga sangdonga lir.

Tang tashinung nisung trok asüba osang aliba ya Sittwe nungi lir. Asürtem rongnung arishi küm 14 tain tebur ka dena lir aser pa süng ka laoa zükset, ta ashir.

Iba yipru agi kongshia aliba tesemtem nungi noksa aser video prokshiba nung ki kilem shizüka bener orr, telecom tower tem laodaktsü aser

billboards tem ki nung oa tsükoka liasü.

Bangladesh nung iba cyclone yagi teraksa tulu magütsü saka anentsüh aser tzümetsüng adoktsü akok, ta ketdangsür temi ashi. Bangladesh nungi tang tashi asü-amaba osangbo mali.

Iba yipru arutsü lia nisung 750,000 dak tema tzükumlen nungi anizüker oa liasü.

Tzü-mopung melenba ajanga cyclone ama yipru tesashiba aser timba akumer, ta scientist temi ashir. Cyclone Mocha ya Myanmar asoshi cyclone tashi tulutiba lir, ta UN-i ashir.

Cox's Bazar nung tawa Myanmar nungi jena arur Rohingya nungertem süki tezükla nung lir. Bangladesh sorkari Rohingya refugee tem parnok camp tem nungi meyok.

Yangji nisung aliba ki 1,300 dak tema den mosque aser angazükdak tesem 16 mopung agi raksatsü, ta ketdangsür temi ashi.

2008 küm Cyclone Nargis agi Myanmar south tsütsü tzükumlen kongshia nisung 140,000 jungnüa asü aser Irrawaddy Delta nung alir nisung million aika dak kongshi.

Thailand election nung opposition temi takok angu

Bangkok, Monupii/May 15 (Agencies): Thailand opposition temi mitkar den sendaktepa aliba party tem

kanga sashia tsükdaktsür election nung takok nguogo, anungji küm ter jungnüa mitkar temi yaria yimsü asüba tatem kati arudaktsütsü asoshi sorkar ka tentettsü atema sapang lapoker.

Thai yimtenren nung tashi tasenba, Move Forward Party (MFP) ajanga vote timba ngutet, shirnok dak 2020 küm

democracy bukuma longkak aitba nung shilem agiba lanurtem tashi nung lir.

Vote shilem 99 azüngba nung liberal Move Forward Party aser populist Pheu Thai Party temi vote timba nguteta lir, saka telok kati sorkar tentettsü jenjangbo metongtet, kechiaser 2014 küm mitkar temi sorkar atsüngdoker parliamentary rules züluba nung balaka shia lir.

Thailand nung yimsü asütsü asoshi opposition party temi

mitkar yimsüsür temi shimba Senate indang züngsemtem densema camp balala nungi teyari angutsüla aser ato kilonser akumtsü atema vote agiteptsü aser sorkar tentettsü.

Deobarnü agiba election ya mapang talangka billionaire Shinawatra'er kibongi kumtetba Pheu Thai aser tongtipang institutions nung tashi aliba conservative aser mitkar tem tsüngta atsütepa arurba tongpang lir.

(Maneni tapak 8 nung...)

Wrestlers temi Olympians aser tanga linük dang teyari meshitsü



Wrestling Federation of India (WFI) tir Brij Bhushan Sharan Singh anema longkaka aitba mapang Wrestlers Vinesh Phogat aser Sakshi Malik nungertemi osangbener den jembiba noksa nung angur.

Monupii/May 15, 2023

(Agencies): Longkak aita aliba wrestler temi Hombarnü tanga linük nungi Olympic medallists aser asayatem dang teyari meshia iba longkak aitba sentong ya alima ajunga dangi atsülanga bener aotsü asoshi telemtetba agiogo aser taoba WFI tir Brij Bhushan Sharan Singh mepura May 21 nü telemtetba tulu ka agitsü ta amokmerenogo.

India nunger nungtugu wrestler Bajrang Punia, Sakshi Malik aser Vinesh Phogat nunger linük yimtiba kübok Jantar Mantar nung taoba anogo 23 longkak aita arudar, parnoki tetsür wrestler tem dak mebeshitsü yimya beshiba atema Brij Bhushan aputsü asoshi khanga arudar.

"Onoki iba longkak aitba sentong ya tanga linükia bener aotsü. Onoki tanga linük nungi Olympians aser Olympic

medallist tem dang teyari meshitsü," ta 2018 Jakarta Asian Games gold medallist Vinesh-i ashi.

Lai ashiba agi, Deobar aonung parnok sentongtem nisung kari raksatsütsü merang aser longkak aitba tesem nung parnok meitdar.

"Nisung kari onok longkak aitba minprongtsü merang. Taoba mapang longkak aitba tesemi yipden bener aruba mapang iba ya atalokogo.

"Onok meitdar. Nüburtemi onok indang noksa agir aser record asür. Onoki parnoki dang noksa magitsü asoshi ashir saka parnoki mangar. Mejangjaba nisung (tetsür) kar idaki (wrestler temi süa aliba süki) mejangtsü meranger," ta Vinesh-i ashi.

"Onoki memetetba tetsürtem aonung idaki yoker.. onoki longkak aitba tesem nung matalokdaksünüba inyaksü

meranger.. koba ajanga onok tenüng menüksür aser ochi asoshi onok nokdakba raksatsür," ta lai ashi.

Laisa, wrestler temi longkak aitba tesem nung dang rangloker minyaksü saka linük nung aliba lisopur ajak nem onok takhangba metetdaksütsü merangtsü, ta ashi.

"Jantar Mantar nung onok inyaksangshi mesademi akümer ama bilemer. Anungji onoki koda tanga tesemtem nung longkak aiter yamaji nüburtemi tajungba meteta akümtsü.

"Tanü onoki Connaught Place-i oa nüburtem den sensaksema parnok teyari meshitsü telemtetba agia liasü. Onoki May 21 nü ya deadline ama latettsüogo. Iba anogo tashi nung telemtetba kecha magira onoki jenjang tesashiba ka agitsü," ta Vinesh-i ashi.

Thailand election nung opposition...

(Tapak 7 nungi...)

Saka Move Forward ajanga lanurtem teyari nung tzüsem tulu amai takok ngutetba yagi Thailand nung amenoka aliba establishment tashi tendangtsü. Kasa mapang tang yimsü tesüdak party temia tentet balala aser shishilempaba aser supply aziokba yimya nung temelenshi arutsü nangzükur yimtiba, Bangkok nung kanga junga takok nguteta lir.

Arishi küm 42 tain Move Forward lenir Pita Limjaroenrat-i iba election osang ya jangratemsüka lir, ta ashi aser sorkar ka tentetba mapang party tangatetba nung nokdaksü nangzük.

"Ibai dictator anemer, mitkar anemer temi tentetba party asütsü. Yangi Thailand nung minority sorkar tentettsü tamakoktsü ta ajaki takzütettsü," ta pai osangbener dang ashi.

Iba election result ya mitkartem aser parnok den sensaktepa alirtem asoshi tamakok tulu lir. Saka parliamentary ozüng par tsütsü lir aser par den tejangja nübu tem dena lir, anungji sorkar nung

par shilem alitsü.

Taoba mapang mitkar temi sorkari atsüngdokdang lenir alisang retired general Ato Kilonser Prayuth Chan-ocha ya küm toku tashi tekolakba ama inyaka arur ano maneni inyaksü nübu yima liasü aser sorkar nung temelenshi arura rongrong adoktsü, ta tekumdangtsü shia liasü.

Deobarnü pa United Thai Nation party headquarter nungi ola madoki ayazüka ao, kong pa bukumer ishika liasü.

Yangji staff kar chiyongtsü machi aliba auso anasa meta liasü aser television screen tulu ka nung Move Forward leniri o jembiba live sayua liasü.

"Linük nung tesunep aser yimchi-yimjung alitsü ni amanger. Ni democracy aser election akumtsübor. Kanga pelar," ta Prayuth-i osangbener dang ashi.

2001 nungi tenzüka election shia vote timba nguteta aruba Pheu Thai yagi Deobarnü agiba election nunga takok angutsü imla liasü. Parnoki kumtetba sorkar pezü nungi asembo

office nungi atsüngdoka liasü.

Thailand chubai sen indokba aser tashi amshiba anema 2020 küm longkak aiter iba election ya mezüngbuba alitsü.

COVID-19 aziüoktsü mechi ozüng balala agütsüba ajanga longkak aitba sama aser lenir aika apu, saka Move Forward Party bukumer tali adoka tashi itshi.

"Tanü-asüngbo lanurtemi pei temeden asoshi bilemer aser parnoki vote agütsütsü," ta Deobarnü vote agütsüi arudang Pita-i osangbener dang ashi.

Move Forward Party yagu millennial aser Gen Z voters tem bushi, shirnok vote agütsütsü temsüa alir nisung million 52 nungi tesadang jungnüa lir, saka election result ajanga telemsa makai vote agütsüba sayur.

Par teloki Bangkok nung district ka dak alaka tanüngba district ajunga nung takok angur.

Parnoki linük north tsütsü Chiang Mai yimti anasa Thaksin Shinawatra'er ki aliba district nung dena Pheu Thai züngsem longsoa aliba district ajak nung takok angutsü takzüteta lir.

India Sudirman Cup nung tsükogo

Monupii/May 15, 2023

(Agencies): Sudirman Cup badminton tournament nung Hombarnü Group C asaya nung Malaysia makokba slen India team iba asayamung nungi tuguogo.

Nüngtugu asayar Kidambi Srikanth aser PV Sindhu nati pei tata asaya junga masayateti India team iba tetushi asayamung nungi tsükogo.

Tebur kija asaya nung Srikanth-i imlaba dang nungi tamajungba asaya aser kasa mapang nung Sindhu-ibo kanga meranga asaya saka decider nung la world No. 30 asayar Goh Jin Wei-i tsükdakja liasü.

Tarep asaya nung Dhruv Kapila aser Ashwini Ponnappa na atema world No. 8 tarep Goh Soon Huat aser Lai Shevon Jemie na akoktsü temela masü asü aser yamaji India nunger tarep yagi kanga meranga asayadang ajisüaka 16-21, 17-

21 agi asaya makok.

Tebur kija asaya nung Srikanth-i asaya koka India asoshi timla agütsütsü imla liasü ajisüaka pai aibelen kanga mena aser 16-21, 11-21 agi world No. 8 asayar Lee Zii Jia mekoki liasü. Lee-i iba asaya tetenzük nungi amokbanger asaya aser mezüngbuba asaya ana sülen parnok 0-2 agi tejakdang aküm.

Tetsür kija asaya nung World No. 12 Sindhu-i tasembuba game nung 2-11 agi tesülen aliba kanga meranga arishi tua asaya ajisüaka tatem nung Goh-i asaya 21-14, 10-21, 20-22 agi koka Malaysia team 0-3 agi tejakdang aküm.

Iba asaya makokba sülen India team Group C nung tasembuba jenjang nung tembang aser Chinese Taipei aser Malaysia na temaba jenjang nung tembangba team ana ama quarterfinals-i iogo.

Afghanistan team nung Abdul Rahman züngoksemogo



Monupii/May 15, 2023

(Agencies): Sri Lanka den one-day international asaya asem asayatsü aliba atema asayar 15 agi kumtetba team nung Afghanistan-i uncapped asayar arishi küm 21 tain fast bowler Abdul Rahman shimokogo.

Afghanistan team taküm India nung asayatsü aliba World Cup atema qualify süogo, ajisüaka Sri Lanka-bo qualifier asayba sülenang iba asayamung nung shilem agitettsü magitettsü jangjatsü.

"Iba asayamung atema lanur asayar ka ana shimokba ya kanga tajung lir," ta Afghanistan Cricket Board mendenbuba Mirwais Ashraf-i Hombarnü ashi. "World Cup atema renemshi tenzüko aser onok team tajung ka yanglutsü atema takokba tashi merangdar aser parnok iba asayamung atema renemtsütsü," ta paisa ashi.

Shahidullah Kamal, Yamin Ahmadzai, Zia Ur Rahman Akbar aser Gulbadin Naib nunger taoba küm November

ita Sri Lanka nung asayaba mapang Afghanistan team nung züngoksema liasü aser tang parnok reserve nung yua lir.

ODI team nung asayar tejen Rashid Khan, Mohammad Nabi, Rahmanullah Gurbaz aser Noor Ahmed nunger densema lir, shirnok tang Indian Premier League nung tasayadak lir.

Linük ana tsüngda asaya asem Hambantota nung June 2, 4 aser 7 nü asayatsü. Afghanistan-isa World Cup masaya tsüngda Pakistan den ODI asem asayatsü asoshi sentong yangludat. Asia Cup-a September ita asayatsü lir, kong Afghanistan, Sri Lanka, Bangladesh, India, Pakistan aser Nepal tokteptsü.

Squad: Hashmatullah Shahidi (captain), Rahmat Shah, Rahmanullah Gurbaz, Ibrahim Zadran, Riaz Hassan, Najibullah Zadran, Mohammad Nabi, Ikram Alikhail, Azmatullah Omarzai, Rashid Khan, Mujib Ur Rahman, Noor Ahmad, Abdul Rahman, Fazalhaq Farooqi aser Farid Ahmad Malik.

BILEMDANGANG

"Pei-i kechi langa ali aji dang angutsü."